

增修埤雅廣要

增修埤雅廣要卷第三十三

什物門

異音類

浮磬

王子年拾遺記曰浮磬傳瀛洲地上有青石可  
以爲磬其石長一丈輕若鴻毛

洞冥記漢武帝起招仙閣於甘泉宮西其上懸  
浮金輕玉之磬

石磬

漢武時犍爲郡於水濱得石磬十六枚劉向說

上宜興辟雍設膠序隆雅頌之音以風化天下

黃鐘

李嗣真太常缺黃鐘鑄不能成嗣真疑土中有  
之道上逢車鐸聲甚厲曰此宮聲也市以歸振  
於空地若有應者掘之得鐘衆樂遂和

石鐘

李渤記曰得雙石於潭上扣而聆之南音函胡  
北音清越

玉鼓

春秋孔演圖有人扣金輿擊玉鼓駕六龍

## 石鼓

周宣王之獵碣也其文皆史籀筆迹鼓有十散  
在陳倉野中鄭餘慶遷之鳳翔孔子廟昌黎作  
前石鼓歌曰張生手持石鼓文勸我試作石鼓  
歌少陵無人謫仙死才薄將奈石鼓何周綱陵  
遲四海沸宣王憤起揮天戈大開明堂受朝賀  
諸侯劒佩鳴相磨蒐于岐陽聘雄俊萬里禽獸  
皆遮羅鐫功勒成告萬世鑒石作鼓隳嵯峨從  
臣才藝咸第一簡選譔刻留山阿雨淋日炙野  
火燒鬼物守護煩撝呵公從何處得紙本毫髮

備盡無差訛辭嚴義密讀難曉字體不類隸與  
蝌年深豈免有缺畫快劒斬斷生蛟鼉鸞翔鳳  
翥衆仙下珊瑚碧樹交枝柯金繩鐵索鏤鈕壯  
古鼎躍水龍騰梭陋儒編詩不收入二雅褊迫  
無委蛇孔子西行不到秦倚撫星宿遺義娥嗟  
余好古生苦晚對此涕淚雙滂沱憶昔初蒙博  
士徵其年始改稱元和故人從軍在右輔爲我  
量度掘曰科濯冠沐浴告祭酒如此至寶存豈  
多氊包席裹可立致十鼓只載數駱駝薦諸太  
廟比郃鼎光價豈止百倍過聖恩若許留太學

諸生講解得切磋觀經洪都尚填咽坐見舉國  
來奔波剗苔剔蘚露節角安置妥帖平不頗大  
厦深簷與覆蓋經歷久遠期無他中朝大官老  
於事詎肯感激徒媿嬰牧童敲火牛礪角誰肯  
着手爲摩挲日銷月鑠就埋沒六年西顧空吟  
哦義之俗書赴姿媚數紙尚可博白鵝繼周八  
代爭戰久無人收拾理則那方今太平日無事  
柄用儒雅崇丘軻安能以此上論列願借辯口  
如懸河石鼓之歌止於此嗚呼吾意其蹉跎東  
坡作後石鼓歌曰冬十二月歲辛丑我初從政

見曾叟舊聞石鼓今見之文字鬱律蛟蛇走細  
觀初以指畫肚欲讀嗟如箝在口韓公好古生  
已遲我今况又百年後強尋偏旁推點畫時得  
一二遺八九我車旣攻馬亦同其魚維鯁貫之  
柳古器縱橫猶識鼎衆星錯落僅名斗模糊半  
已似癡牴詰曲猶能辨跟肘娟娟缺月隱雲霧  
濯濯嘉禾秀稂莠漂流百戰偶然存獨立千載  
誰與友上追軒頡相唯諾下挹冰斯同穀穀憶  
昔周宣歌鴻鴈當時籀史變蝌蚪厭亂人方思  
聖賢中興天爲生耆耆東征徐虜闕虓虎北伐

犬戎隨指喉象胥雜還貢狼鹿方召聯翩賜圭  
卣音酉遂因鼙鼓思將帥豈爲考擊煩矇瞍何人  
作頌比崧高萬古斯文齊岫嶠黜勞至大不矜  
伐文武未遠猶忠厚欲尋年代無甲乙豈有文  
字記誰某自從周衰更七國竟使秦人有九有  
掃除詩書誦法律投棄俎豆陳鞭杻當年何人  
佐祖龍上蔡公子牽黃狗登山刻石頌功烈後  
者無繼前無偶皆云皇帝巡四國烹滅彊暴救  
黔首六經旣已委灰塵此鼓亦當隨擊掇傳聞  
九鼎淪泗上欲使萬夫沉水取暴君縱欲窮人



力神物義不汙秦垢是時石鼓何處避無乃天  
工令鬼守興亡百變物自閒富貴一朝名不朽  
細思物理坐歎息人生安得如汝壽晉武帝吳  
郡崩出一石鼓打之無聲張華云可以蜀中桐  
木刻作魚形扣之則鳴如言聲聞數十里

叔異苑

劉敬

### 銅鼓

虞喜志林建武二十四年南康郡男子獻銅鼓  
有銘

鷺鼓

旨歸曰建棲翎鷺於其上不知何代所加或曰鷺鼓精越王句踐擊大鉞於雷門以獻吳晉時移於建康有雙鷺吮鼓而飛入雲或曰非也詩有振振二鷺古之君子飾鼓以鷺存其風流

### 夔鼓

黃帝內傳黃帝與蚩尤戰玄女爲帝製夔鼓以當雷霆

注以夔皮爲之

### 玉笛

明皇與葉法喜游月宮回過潞州城上以玉笛奏曲旬餘潞州奏八月望夜有天樂臨暉城兼

法外集  
獲金錢

集異相

鐵笛

趙宋隱者劉兼道游武夷奪秀亭劉善吹鐵笛  
有穿雲裂石聲因名鐵笛亭

方輿

神鉦

洞庭山石樓下有二石叩之聲如鉦號神鉦

述

異記

鳳簫

列仙傳簫史秦穆公時人善吹簫能致孔雀白  
鶴穆公女弄玉亦好吹簫公以妻焉乃爲築鳳

臺後隨鳳去故秦人作鳳女祠時有遺音

鵝鈴

雜俎濟南有鵝浦漁人居水側常聽鵝聲中有鈴音甚清亮候之見一鵝咽頸極長羅得之項上有銅鈴云以銀鑲隱起元鼎元年字

玉管

許慎說文曰舜祠下得笙玉管夫以玉作音故神人以和鳳凰來儀也

方響

樂器名胡部無方響以直板聲不應諸調惟太

宗內庫片鐵方嚮應二十八調

明皇雜錄

喚鐵

太白山隱仙以鉦擊一片鐵鳥獸聞之則集名

曰喚鐵

天寶遺事

蕤賓鐵

樂工廉郊精琵琶嘗池上彈蕤賓調忽荷問躍

出方響一片乃蕤賓鐵也指撥精妙物類相感

爾

琵琶錄

冰鐵鏡

冰鐵鏡能照魔降邪辟瘟人謂曰此靈鏡也

出

柯亭竹

伏滔長笛賦序曰余同僚桓子野有故長笛傳之耆老云蔡邕叔製也初邕避難江南宿於柯亭之館以竹爲椽邕仰而舐之曰良竹也取以爲笛奇聲獨絕歷代傳之

爨下桐

蔡邕在吳聞人家爨下桐爆聲知其良材因請之果良以治琴琴成尾有焦處因號焦尾桐

霹靂桐

坡零陵湘水枯桐一夕暴震火焚之餘超道人  
取爲三琴甚良名霹靂桐

霹靂鐸

海上漁人得一鐸聲如霹靂識者云始皇驅山  
鐸也燕間錄

赤玉簫

世國春秋源州胡安盜晉文王張駿墓見駿容  
貌如生得赤玉簫紫玉笛

昭華琯

西京雜記高祖初入咸陽宮周行府庫金玉珍

寶不可稱言其尤驚異者笛長三尺三寸六孔  
銘曰昭華之琯

姑洗角

唐楊收泮陽耕得古鐘高尺餘收扣之曰此姑  
洗角也有刻在兩欒試之果然

黃鍾角

後周長孫紹遠司樂黃鍾不調偶聞浮屠三層  
上鐸鳴因取配奏始諧

史

牛鐸

晉荀勗路逢趙賈人車牛鐸鳴識其聲及掌樂



音未調曰得趙賈人之牛鐸則諧矣後得之果諧史

鞞鐸

晉石勒爲人耕聞鞞鐸之聲以告其母母曰是汝作勞而耳鳴爾非不祥也本

清角

韓子師曠援琴鼓之曰不如清角一奏雲從西北方來再奏大風雨裂帷幙俎豆墮廊瓦韓子

異感類

寶鼎

漢武帝時汾陰巫錦爲民祠魏睢后土營旁見地如鈎狀掇視得鼎以禮迎鼎至甘泉從行上薦之至中山晏溫有黃雲蓋焉至長安公卿大夫議謂之寶鼎現改元元鼎

龜紐

會稽錄孔愉見大龜乃買而放之中流龜乃左顧者數四及愉封侯鑄印印龜回首者三似所放龜

雀環

後漢楊寶年七歲行於華山見一黃雀被瘡爲

螻蟻所困見而憐之因收於巾箱內採黃花以飼之經十餘日瘡愈旦去暮來忽一日變爲黃衣年少與玉環二雙報曰好掌此環子孫累世爲三公

鵲印

張顥爲梁州牧有山鵲飛翔化爲圓石顥椎破之化一金印其文曰忠孝侯印

鳩鈎

三輔吏錄曰扶風張氏之先爲郡功曹晨起當朝有鳩從盛塵上飛下几前功曹曰鳩何來爲

禍耶飛上盛塵爲福耶飛入我懷開懷待之飛入懷中探得銅鈎帶之歷官至太守九卿有蜀客至長安私賂張氏婢婢盜賣鈎與客客家喪禍懼而却還張氏得鈎復爲二千石後因失鈎張氏遂衰

### 燕釵

漢起招靈閣有神女留一燕釵帝以賜趙婕妤至昭帝時宮人謀欲碎之明日視釵匣惟見白燕升天去宮人用作玉燕釵

洞真記

### 蛛合

宋舊俗巧夕以蜘蛛在合子內次日蛛結網圓  
正謂之得巧

夢華錄

### 六鼻鏡

黃巢陷京城南唐王氏有鏡六鼻生雲烟照之  
左右前三方事皆見王照京城巢寇恍在目前

### 玉象

李德裕有道士李終南出玉象子如拳許曰以  
丹砂置象鼻下象服其砂復吐出方可服又出  
一金象云與玉爲偶贊皇服之顏面愈少乃求  
採姝異數百人後南遷逢道士怒索二象公不

與至澗魚潭二象自船飛出光焰燭天公尋卒  
紀異錄

### 木馬

後魏段暉有一童子從暉請馬暉戲作木馬與  
之童子大悅曰吾泰山府君奉勅游學今將歸  
子後封侯言終乘馬騰空而去

史書

### 龍牙

奕棊者取蛻龍牙一枚臨局自然機變橫出

棊訣

### 金梭

蔡州蔡氏七夕禱以酒果忽流星墜筵中明日

瓜上得金梭自是巧思益進

繡被

後漢王忱字少林詣京師於空舍見一書生金  
彥疾生曰我命在須臾腰下有金十斤相贈死  
後乞葬骸骨已而命絕忱鬻一斤營葬餘置棺  
下忱後置大度亭長有馬入亭中而止忽風飄  
一練被復墮忱前後乘馬到維縣人問所由得  
馬忱說其狀人曰卿何陰德而致此忱說葬事  
人曰是我子也大恩久不報天以此章卿德耳

藜杖

劉向校書天祿閣夜暗獨坐誦書有老人黃衣植青藜杖叩閣而進吹杖端烟燃與向說開闢以前向因受五行洪範之文至曙而去曰我太乙之精天帝聞卯金之子有博學者下而觀焉乃出竹牒天文地理之書悉以授之

### 玉局

後李老書與張道陵至成都有局脚玉牀自地而出故以玉局名之彭乘記未似西歸玉局翁蓋坡時提成都玉局

### 鐵鏡



蜀王宗壽得鐵鏡晦不可睹一日忽光彩因見  
市舍一青衣小兒卅角獨坐令來訪欣然肯來  
因曰鐵鏡神物當還去宗壽出鏡與之長揖而  
去

九國志

### 銅盤

許彥遇一書生云脚痛求寄鵝籠中前行息樹  
下生口吐一銅盤具有饌酒數行又吐一美女  
子一男子共酌日晚生悉納口中留銅盤與彥  
續齊諧記

### 鐵船

賈郁爲仙游令受代一吏酣酒郁曰吾當再典  
此邑懲此輩吏云此猶造鐵船渡海也郁聞之  
不言後復典邑醉吏爲庫吏盜官錢數萬郁抑  
榜尾云竊銅鏹以潤家非因鼓鑄造鐵船而渡  
海不假鑪鎚杖徒之又張果老許旌陽鐵船事  
俱載別傳

### 葉舟

陳季卿家江南舉進士不成訪青龍寺東壁有  
寰瀛圖季卿指曰安得自渭達河至家旁有終  
南山翁笑曰此不難命折竹葉作舟置圖上令

季卿熟視久之覺波浪起葉漸巨恍然若登舟  
旬餘至家一更復登再游青龍寺見山翁尚擁  
褐而坐季卿曰非夢乎後妻子自江南來曰某  
日歸題詩於西齋始知非夢

袋玦

國史異錄秘書少監崔行功未得大夫前忽有  
鴈鵠銜一物入其室乃魚袋鈎玦也不數日加  
大夫

玉璜

文王至潘溪見呂望釣得玉璜刻曰姬受命呂

佐

玉鏡

觀日玉大如八寸鏡以之映日觀見日中宮殿  
相感志

金簡

吳越春秋禹傷父功不成乃巡衡山血馬而祭  
之忽夢男子自稱玄夷蒼水使者謂禹曰若欲  
得我山神書者齋焉禹乃退齋三日遂獲金簡  
玉字之書得治水之要刻山石之高處

玉策

風俗通古封太山禪梁甫說岱宗山有金匱玉  
策能知人年壽脩短漢武帝採策得十八因倒  
讀曰八十其後壽八十

玉舄

嶺表菖蒲澗一節九寸安期生服之上升遣玉  
舄秦皇因立玉舄閣

玉杵臼

裴航遇雲翹夫人與詩云一飲瓊漿百感生玄  
霜搗盡見雲英藍橋便是神仙窟何必崎嶇上  
玉京後航謁一舍見老嫗揖之求漿嫗令雲英

以一甌漿水飲之航欲娶雲英姬曰得玉杵曰  
當與後航得玉杵曰遂娶而仙去

太平廣記

### 井銅

龐儉少失父後鑿井得銅千餘萬買奴得老蒼  
頭乃父夢語曰鑿井得銅買奴得翁

### 金盃

崔少府女亡有金盃着棺後盧充與之幽婚女  
贈金盃詳見墓女幽婚又一行師云長安未寧  
坊是金盃地

### 玉棺

鄴縣令王喬天下一玉棺喬曰天帝召我沐浴  
寢其中葬於城東

風俗通

### 銅棺

鄭州監酒鄒宿爲官公正無私人所推敬一日  
鄭州日當午天降風雹烟雲四起於北門黑霧  
盤地直經晝久不散忽降下無蓋銅棺一具但  
聞空中音樂嘹唳時鄭州自守倅以下官吏將  
校士庶僧道盡易衣服欲入銅棺而外狹內寬  
皆莫能入續監酒巾裹而來衆請之入棺卽無  
所碍少焉復降銅蓋綵雲繚繞擎舉而上終

增修埤雅廣要卷第三十四

什物門

異稟類

石中瓠

廣漢之雷公橋有鉅砮石蹲於橋側一夕雷剖之取一瓠而去但見其石中分在地彼此各存半瓠形云不知此石成質以來何由孕此瓠爾

石中松

武宗時夫餘國貢松風石方一丈中有枯松盛夏颯颯涼飈生於其間

杜楊編



土中竿

季桓子穿井得物如竿孔子曰簞竿也土中之  
惟蓋土精也又東坡云山妖竄夔簞亦云惟也

核中酒

烏孫國有青田核莫測其樹核大如升盛水卽  
化爲酒味甚淳美飲盡隨更注水隨盡隨來酒  
不可久久則苦不可飲名曰青田酒

竈中兔

王卿爲天師守丹竈竊發其封一白兔躍出衆  
皆曰兔已去矣一道士爲化雀飛去須臾擒兔

復投竈中 原化記

### 手中珠

有長者携一子見師子比丘曰此子當生便拳左手願聞宿因師卽以手接曰還我珠來童子遽開手奉珠師曰昔有童子婆舍隨吾赴西海齋受觀珠付之今見還矣遂爲法嗣

### 肉中印

海隅有獸曰野婆嘗竊人家小兒育而與之偕里人登高望其處而罵之則復送還人以機陷獲之加箠至死惟以手掩腰剖視之得玉印

齊

癭中猱

伶人刁俊朝妻巴嫗項癭忽如數斛囊作琴瑟  
笙聲音妻欲以刀決拆之癭忽拆裂一猱跳出  
有頃黃冠呼曰若非癭中猱也本是老猴精解  
致風雨與老蛟往還天誅蛟搜索黨與故匿夫  
人之頷於鳳凰山神處得起亡膏塗之卽愈如  
言果驗

疣中雀

金州防禦使崔堯封有甥李言吉左目上忽痒

而生一小瘡漸大如鳴卵其根如弦常壓其目不能視飲之乃令大醉遂剖去之言吉渾不覺也贅既破中有黃雀鳴噪而去

### 瘤中碁

昔處士蒯亮言其所知額角患瘤醫爲剖之得一黑石碁子巨斧擊之終不能損

### 瘡中針

客有足脛生瘤者因至親友處爲獐犬所斷正齧其瘤其得針百餘枚皆可用疾亦愈

### 異見類

橘中叟

巴園人收兩大橘如三斗盎剖之有二叟相對身長尺餘象戲一叟曰橘中之樂不減商山但恨不得深根固蒂爾一叟曰僕饑矣須龍脯食訖以水噴地俱化白龍而去

幽冥錄

竹中仙

黃庭堅治平二年冬十一月初二日爲鏡堂僧作梅亭記閤幽恠錄云鄔延長吏有大竹凌雲可三尺圍伐剖之見內有二仙翁相對云平生深根勁節惜爲主人所伐言畢乘雲而去庭堅

曰此與昔人橘園叟之事無異

蛤中聖

唐文宗嗜蛤蜊一日御饌中有劈不開者焚香禱之乃開見菩薩形具足賜興善寺

璞中像

湖南永州有仙曰蘇耽山號蘇乃其飛昇之所也山中多石人以鋸界破其像有桃株有塔樣有觀音彌勒寒山拾得像甚至有天下蘇山四字不知造化何爲而融結哉

犀中鹿

凡犀角遇山川日月草木鳥獸隨寓成影月與魚等皆是常有獨宋韓魏公犀帶中央一片乃鹿啣花已是絕奇宋孝宗居德壽宮光宗上壽以萬緡賂海商得犀角一片是南極老人星像但以扶杖稍短衆以爲絕嗣泣杖乃不祥之物而卻之是寶今已流落不知何之

空中鼓

元至正二十七年春正月乙未絳州夜聞天鼓鳴將旦復鳴其聲如空中戰鬪者

空中錫

唐吳元濟與官軍交鋒未決鄧隱峯禪師擲錫  
空中飛身而過兩軍仰觀遂解

風中橐

東坡云如投水海中如風中鼓橐雖有大聖智  
亦不分別

鼓中鶴

有鶴飛入會稽雷門鼓中於是鼓聞洛陽後所  
破鼓鶴飛去鼓不復鳴

淮海記

蓋中鶴

有一貧儒訪周益公致搖尾乞憐之意益公與



入書室前後郡縣篋貢充朝其中公言任意取其  
其二儒如公言旣行渡江發視之一爲茗甌一  
爲湯盞怒而碎之其僕忽救得一湯盞歸以點  
湯湯纔注其中雙鶴飛舞啜盡始滅不知何異  
也貧儒聞之懊恨而已

杯中蛇

樂廣嘗有親客曰前蒙賜酒方欲飲見杯中有  
蛇旣飲而疾于時河南廳壁有畫角弓廣復置  
酒其處曰復有所見否曰如初廣乃告之沉疴  
頓愈

## 車中猴

葉氏嫁大賈任華忽夢父升曰吾與汝夫湖中遇盜殺我者車中猴門東草殺汝夫者禾中走一日夫辨者曰車去兩頭爲申字猴之屬也門東草爲蘭字禾中走穿田過也亦申字一日夫春字也其申蘭申春平後得盜果然

## 舟中象

魏太祖巨象欲知其斤而不可秤少子蒼舒曰置象於舟刻其水痕而以土覆則知其數也帝悅之

魏志

甕中匣

元和初夏侯乙庭前生百合花大於常數倍因發其下得甕匣十三重各匣一鏡惟第七者光

照目

雜俎

甕中蠍

黃靖國死見冥中治武后獄以大甕貯萬蠍螫之

影響錄

鯉中刀

詳見河神還刀

塚中鬼

孔子卒戒門人作虛墓十間後果秦始皇發之

至九閭有兔躍出逐之過曲阜十八里而沒掘  
不可得因名曰白兔溝

### 墓中雉

衛侯女嫁于齊太子至中道太子死母悲曰且  
往當喪哀畢不肯歸終之以死母悲悔之取女  
所操琴於塚上以鼓之忽有二雉俱出墓中母  
悲二痛援琴作雉朝飛操

### 鏡中蛇

袁孝叔遇異人得書每受一命卽開一緘皆驗  
一日晨起對鏡中墮一物如蛇驚仆疾而卒書

尚在妻啓視之一幅畫蛇蟠鏡餘皆空紙前定錄

筍中蛇

後馮緄開綬筍有兩赤蛇分南北走許曼占之  
史曰三歲後當爲邊將官有東名後爲遼東太守

壙中龜

張廣定避亂一女年四歲棄古塚中以數月乾  
飯及水漿與之後三年收所棄女骨仍坐塚中  
言糧盡見塚中一物伸頸吞氣試効之輒不復  
饑乃大龜爾抱朴子

龕中龜

張鋌見巴西侯飲酒之夜有曰洞玄先生在門  
言訖一人披黑衣頭長身廣揖與坐天將曉鋌  
轉悟見身臥石龕中一龜形甚巨也

宣室記

羶中針

杜錫遷太子中七屢諫愍懷太子太子置針錫  
坐處羶中刺之流血不少動

車中棘

左慈過徐隨門下有客車六七乘欺慈云徐公  
不在客忽見在楊柳杪車中皆生荆棘客慎入

報隨隨曰左慈也客逐慈扣頭謝客還無復荊棘矣

腹中角

李平字正方孔明曰陳季起爲吾說正方腹中有鱗角不可近吾以爲鱗角者但不當犯之爾

增修埤雅廣要卷第三十五

文物門

字書類

始制文字

夫字者氣之孫聲之子也未有書契以前結繩刻木而已逮軒皇世蒼史頡觀日月星辰鳥獸草木之文始制文字以代結刻之勞後世因之而孳生無窮之字也

頗識難字

韓魏公知揚州王介甫以新進僉書判官事魏



公不以吏事許之秩滿去會有上書者多用古  
字韓公笑曰惜介甫不在其人頗識難字介甫  
謂輕已怨之

好問奇字

楊雄有好事者時載酒問奇字劉棻嘗從雄學  
作奇字

惜故帑字

宋益都王孝先之未生也父夢聖尼携曾參至  
曰汝惜吾字今俾參爲汝子故孝先之諱曰曾  
五見宿生類

碑美沒字

五代安叔千狀貌堂堂而不通文字人謂沒字  
碑晉末契丹犯京師叔千等迎之出班夷言耶  
律德光問曰汝是安沒字否當與汝一喫飯虎  
史

豸不識字

唐侯思止求爲御史高元禮教之曰如問君不  
識字宜對以獬豸未嘗識字

詳見獬豸

識一丁字

張弘靖曰挽兩石弓不如識一丁字

識八分字

阿買不識字頗知書八分魯直曰阿買退之之姪小字也

止識十字

蜀王平爲鎮北大將軍所識不過十字而口授作書皆有意理使人讀史備知大義與石勒使人讀漢書事同

並見史

制誥三字

王禹偁曰摘毫終要居三字出郡終須借一麾三字謂知制誥也

中書五字

裴休制詞綸闈回五字之妙謂中書舍人也王  
壻自中書除待制詞禁垣揮翰中書日宣

舍人七字

趙宋呂溱自貴重見賓客不及數言號七字舍  
人國史

導引六字

六字持身已有餘后山導引有六字氣嘻吁咽  
噓呵呼也

書空四字

晉殷浩都督諸軍以敗績被黜終日書空作咄咄怪事四字而已

石缺二字

禰衡與黃祖子射共讀蔡邕碑曰吾雖一覽猶能識之惟其中石缺二字更不明耳因書之射寫碑較不差莫不嘆服

獻三十字

唐晉州男子詢謨持竹筥葦席行哭長安市口欲獻三十字一字言一事若不中以筥貯屍席累棄之代宗召見言團者願罷團練使監者願

罷監軍之類

史

賦三千字

趙宋夏竦對策廷下有中貴以吳綾手巾乞詩  
題曰殿上袞衣明日月硯中旗影動龍蛇縱橫  
禮樂三千字獨對丹墀日未斜

韻編千字

千字文乃梁武令殷鐵石於鍾王書中榻一千  
字每字片紙雜碎無序乃召周興嗣韻一口編  
綴鬚髮皆白

尚書故實

詩改半字

唐詩人夜宿峯頂寺題壁曰絕頂松楸生夜涼  
鶴翻清露滴衣裳前村月照一江水僧在翠微  
開竹房書畢旣下忽憶月照一江水之時開竹  
房月方就中恐太早返而易一爲半字則僧已  
易之矣

令改一字

高駢命酒佐薛濤改一字令駢曰口有似沒梁  
斗濤曰川有似三條椽公曰奈何一條曲濤曰  
相公尚使沒梁斗至窮酒佐三條椽一條曲又  
何足怪

石改右字

五代石昂入朝楊延郎知留後事贊者以延郎諱石更其姓曰右昂曰昂姓石非右也延郎怒起史

恨改幸字

蕭楚才見張乖崖几案間詩獨恨太平無一事淮南閑殺老尚書卽改恨爲幸曰天下一統恨太平何也公曰一字之師類說詩話

詩用薺字

羅浮山記云望平地樹如薺故戴嵩詩云長安



樹如薺後有人詠樹詩云遙望長安薺此耳學之誤

顏氏家訓

### 丁改刁字

李知遠權知吏部侍郎有選人姓刁者與王志忠並被放密與令史改刁爲丁改王爲士擬受官後卽添成文字知遠一覽曰今年銓覆之人總識姓名安有丁士姓者此必刁某也省內以爲神明

會要

### 冒改姓字

范蠡改姓陶范睢改姓名張祿祥袍田千秋之

後改姓軍祥車疎哲改姓束祥束奚氏至康改姓嵇此類甚多又衛青父鄭季給事陽信公主家奴與衛媼通生青故改姓

撰記減字

錢思公鎮洛命僚屬各撰河南驛記謝希深七百字歐公五百字尹師曾三百八十字歐乃別撰一記更減師曾十三字尤完粹有法

湘山野錄

增損一字

呂不韋著呂氏春秋暴之咸陽市懸千金其上曰有增損一字者予千金時無能者

史

不差一字

李程初出試場楊於陵詢日五色賦破云德動天鑒祥開日華於陵曰須作狀元翌日無名於陵携示主文曰若有此賦何以待之曰非狀元不可於陵曰苟如此已遺賢矣亟命取卷對之一字不差遂擢狀元

國史

李方叔爲坡翁客坡知舉欲收之旣而下第坡詩云平生謾說古戰場過眼昏迷日五色

語稱好事

司馬徽字德操有知人之鑑不談人短與人言

每事稱好隣有子喪或告之亦答曰好妻諱之  
徽曰吾妻之言亦大好

世說

### 對書忍字

張公藝九世同居北齊隋唐皆旌表其門麟德  
中高宗封泰山幸其宅召見公藝問其所以能  
睦族之道公藝請紙筆以對乃書忍字百餘以  
進其意以爲宗族所以不協由尊長衣食或有  
不均卑幼節禮或有不備更相責望遂爲乖爭  
苟能相與忍之則家道雍睦矣

### 恥題糕字

劉夢德九日詩以五經無糕字遂輟宋子京詩  
飈館輕霜拂曙袍糗餐花飲鬪分曹劉郎不敢  
題糕字空負詩中一世豪

後聞見錄

忌呼溫字

王大造桓南郡桓設酒王不能冷飲語左右令  
溫酒來桓流涕嗚咽曰犯我家諱矣

企聰算字

社日小兒以葱係竹竿於牕中搨之曰開聰明  
或又加蒜欲能計算也

歲時記

掣肘書字

魯君曰子賤借善書者二人從勞引其厚書醜則怒之欲好書則又引之書者辭歸以告魯君曰子賤苦吾擾之不得施善政命母徵發單父未幾化盛行

說苑

### 未正朋字

劉晏以神童爲祕書省正字方十歲上召入貴妃置膝上爲施粉黛上曰汝爲正字一日正得幾字晏曰餘字皆正惟朋字未正

明皇雜錄

### 名偶同字

謝安石住半山有墩曰謝公墩後荆公亦住半

山有詩云我名公字偶相同我屋公墩在眼中  
公去我來墩屬我不應墩姓尚隨公

詩話

郎呼卿字

宋璟燕朝堂張易之昌宗列卿三品璟六品居  
下座易之虛位挹曰公第一人何下座璟曰才  
劣位卑卿何謂第一時易之內寵不名其官呼  
易之五郎昌宗六郎鄭善果曰公奈何謂五郎  
爲卿璟曰以官正當爲卿君非其家奴何郎之  
云

本傳

坡云不識五郎呼作卿

稱公輔字

隋李德林少未有字魏收曰識度天才必至公

輔宜字公輔

史

王珪少孤貧母李氏嘗曰兒必貴未知所與游者何人會玄齡如晦等過其家李氏大驚曰二客公輔才汝貴不疑矣

### 識漫漢字

北齊楊愔有選人曾漫漢自言猥賤不見識愔曰卿前在元子思坊內騎秃尾草驢以方麴障面經見我不下我何不識卿漫漢驚服人曰卿名漫漢果自不虛

史



呼卯君字

東坡云舊聞老蚌生明珠未省老兔生於菟坡  
弟子由已卯生坡號卯君生子名虎兒故云云

呼子仙字

呼子先壽百餘歲臨去時呼酒家嫗令治裝忽  
二仙人持二狗來子先持一與酒嫗因各騎之  
乃龍也上華陰山常呼云子仙酒母在此

列仙傳

呼赤丁字

洛陽牟穎曾葬一枯骨夢人謝云我本強寇全  
輩見害感公掩藏願陰護公若有急但呼赤丁

字後數有驗

鐫安民字

崇寧初蔡京爲元祐黨籍刻石文德殿門又立於天下州廳長安召匠李安民安民曰司馬相公稱其正直今謂之奸邪安民不忍鐫府官欲罪之匠曰被役不敢辭乞不刻安民鐫字於碑恐後世併以爲罪也

長編

物諧聲字

陝西鳳州妓女及翠柳皆可愛又公庫酒美故世言鳳州三出謂妓柳酒也宣城李愈云君州

有四出漆栗筆蜜遊齋閑覽

言四聲字

唐楊綰方四歲客舉坐中物以四聲呼之衆未  
言綰對曰燈盞柄曲衆異之史

壁間題字

元徽之到通州見壁間詩云綠水紅蓮一朵開  
千花萬草無顏色不知何人題錄寄樂天乃樂  
天十五年前贈長安妓阿輓絕句也故白詩云  
偶助笑歌嘲阿輓那知傳誦到通州

樂天集

子不識字

北齊邢邵彫蟲之美獨步當時二子大德大道略不識字史

子呼父字

晉胡毋輔之嘗酣飲子謙之厲聲呼父字曰彥國年老不得爲爾輔之歡笑呼入共飲

怒呼小字

許攸嘗於衆座呼曹操小字曰卿非我不得冀州操笑後殺之

怒呼小子

王爽嘗與會稽王道子飲道子醉呼爽爲小子

爽曰亡祖長史與簡文皇帝爲布衣交何得呼小子

婢皆識字

鄭玄家婢皆讀書識字一婢不稱旨玄使人拽着泥中須臾一婢問曰胡爲乎泥中答曰薄言往訴逢彼之怒玄笑而罷

妓飲書字

宋文潞公之在蜀也頗多宴集有飛語聞于朝上令御史何聖從訪其事潞公懼張少愚曰聖從之來不足慮前在漢州宴會有營妓善舞聖

從愛之曰其女奴曰姓楊爲之喜曰所謂楊臺  
柳耶遂取項帕題字云蜀國佳人號細腰東臺  
御史惜妖嬈從今喚作楊臺柳舞盡春風萬萬  
條此可以見其守也聖從至少愚乃迎其妓雜  
府妓中歌是詩聖從爲之大醉潞公之謗遂息  
陶穀之使江南也崖岸高古若不敢近韓熙載  
謂所親曰吾觀此人其守可隳乃選名妓秦弱  
蘭者衣弊衣灑掃驛庭陶爲之動因作郵亭詞  
使歌之後數日李主張宴出弱蘭歌所贈之詞  
以侑之穀大慚竟至醉吐茵席韋應物之罷蘇

州也過杜鴻漸飲大醉宿傳舍旣醒見二妓在側驚問之曰郎中席上與司空詩記憶否因歌曰高髻雲鬟新樣妝春風一曲杜韋娘司空見慣渾閑事惱斷蘇州刺史腸已上數公皆有動于中以至汙名敗節者多矣東坡使妓求詩於叅寥將以觀其守叅寥口占曰多謝尊前窈窕娘好將魂夢惱襄王禪心已作沾泥絮不逐東風上下狂必若是詩夫然後磨不磷涅不緇而皎皎之行可見矣

異書類

龍馬獻圖

大昊伏羲世龍馬獻圖出于河天一地六居北  
地二天七居南天三地八居東地四天九居西  
天五地十居中天地生成之數也

神龜負書

大禹治水功成受舜禪神龜負書出于洛戴九  
履一左三右七二四爲肩六八爲足中五縱橫  
十五之數也

壁書漆字

書序云先人用藏其家書於屋壁秦焚書伏生



壁藏之儒林傳

宣帝時河內女子毀李耳之家於垣壁得古文皆漆書科斗字也

龜曆古字

堯時越裳國獻千歲龜背有科斗書記開闢以來事帝錄之號龜曆述異記

石室古字

王烈入河東抱犢山石室有兩卷素書不知其字不敢取頗譜十數字形體歸示嵇叔夜盡知其字乃令叔夜重往則失石室所在矣

銅鋌畫字

後魏崔皓好觀星變置金銀銅鋌於酢器中夜有所見卽以鋌畫紙作字記異

史

蠶食葉成字

漢宣帝之未立也泰山石自起立蠶食葉成文曰公孫病已立五字病已乃宣帝之小字也後王莽將窺漢室欲懼服人心亦竊效之使人以蜜書葉曰王莽作天子令螳蟲嚙食其畫良可笑也

寫書空成字

成都左綿龍角之建刹也工匠告完而刹名未  
舉闍梨建會禱于佛請之是日忽聞鴈陣鳴空  
緇檀引領仰觀鴈行乃成無爲二字遂巨書以  
榜其寺云

蠹食神仙字

何諷於書中得一髮捲規四寸許如環而無端  
用力絕之兩端滴水方士曰此名脈望蠹魚一  
食神仙字則化爲此夜持向天從規中望星星  
立降可求丹度世也奈何絕之

神許二字

唐鄭潛曜母疾刺血爲書請諸神丐以身代火書而神許二字獨不化翌日母愈

史

### 驚示佛字

昔人有贖驚者於腹下巨書一佛字放之後舟行墮水覺有物藉足不溺獲至淺渚乃所放驚也返而立於波間佛字儼然

### 血成公字

陶侃手紋達中指至橫文上節絕占曰貴相侃以針挑令徹彈血壁上乃成公字

### 影成相字

宋璟未第時開鏡見影成相字因此自負相業遺事

虎骨乙字

虎夜視一目放光一目着物獵人射之光墜於地成白石兩脇間及尾端有骨如一字長乙二寸卽其威也破肉取得能令人有威佩之辟邪驅疾

用三古字

宋汪玉山典貢舉有布衣交密約試義用三古字爲驗搜卷果符取式及拆號非其友怪問之

云某假宿寺中夢一女哀語乞葬贈書三古字  
是以得薦而前友竟暴疾弗獲入試信有命乎

蟾丹書字

抱朴云蟾三千歲者頭有角頷下丹書八字  
大山云此去三千歲應逢八字蟾

鰲腹天字

易注云鰲九肋者勝目吻腹下有天字者不可  
食

魚腸乙字

魚枕謂丁腸謂乙尾謂丙皆不可食爾雅註魚

腸謂之乙者魚之鰕必自腸始也又以其形屈曲如乙字

東海鰕魚有骨名乙在目旁狀如篆乙字食之鰕人不能出

鴛書印字

鴛啄木鳥也善爲禁法人或閉其穴則曲爪據地畫印啄穴卽開盜竊效之以發人之扃鑰

紗籠姓字

李藩僧相之曰判官是紗籠中人原化記云宰相冥司必以紗籠護之藩果相

王播客揚州木蘭院僧厭苦之飯後擊鐘後二  
紀播鎮揚州訪舊詩有曰上堂已了各西東慙  
愧開梨飯後鐘時僧已碧紗籠之矣續云三十  
年來塵拂面如今始得碧紗籠

冥榜姓字

崔昭暴卒復生云見冥間列榜書人生姓名將  
相金榜次銀榜州縣小官鐵榜

唐書

御改辰字

范文正公倅陳州時郡守母病召道士奏章公  
曰庸人安能達章帝所耶道士秉簡伏壇終夜



牙屋 卷三十三  
不動試捫其軀則僵矣五更微動良久謂守曰  
夫人壽有六年所疾勿慮守問今夕奏章何其  
久也曰方出天門遇放明年進士春榜觀者駢  
道以致稽留公問狀元何姓曰姓王名下一字  
塗注一字遠不可辨旣而郡守母病平愈明年  
狀元乃王拱壽御筆改爲拱辰公始嘆道士之  
通神也

### 御去伯字

世言姓名同者必曰姓名韓公卞諱論亦引之  
但杜操字伯度姓名同魏武帝故去伯字

資  
錄  
服

御去蟲字

趙宋楊蟬太宗不識蟬字因曰以微類名其子何也御筆去蟲名覃

玉壺清話

御改儉字

後周長孫慶文帝曰尚書旣安貧素可改名曰儉以彰雅操

史

御易昶字

翰林編修朱昶宣德秋初侍經筵帝問曰卿名敞從尚文耶對曰從日永之昶也因命書之帝曰日者人君之相奈何背之御筆書易以日加

之未首杲稽首拜嘉

御改照字

劉輝榜有一生名穆曜御筆改曜爲照字蓋詆  
朴魯者爲木鷄也

雜

點加勅字

唐屈突通仕隋文帝與漢王諒約若璽書召驗  
勅字加點則就道帝立召諒無驗諒覺有變

史

餅裂十字

晉何曾務在華侈每食費萬錢猶云無下筯處  
蒸餅不裂十字者不食

篋篋朱字

逸史有李生者其舅姓盧有道術別久忽相遇邀李生詣其居曰求得一妓善篋篋令侍飲李生視篋篋有朱字云雲中辨江樹天際識歸舟盧曰此人名家女莫要作婚姻否李莫測而退後娶陸長源女乃所見於盧家者問何能曰善篋篋示之朱字宛然李生具說女曰往嘗夢至一處亦記見生

門書篆字

宿州天慶觀雍熙中回道入訪觀主者不遇留

詩二首於門其一云手傳丹篆千年術口誦黃庭兩卷經鶴觀古壇槐影裏悄無人迹戶長扃乃玉筍篆丹書也人刮去煎湯治病而字迹復生

### 凌雲題字

魏明帝立陵雲觀誤先釘榜以籠盛韋誕轆轤引上書之去地二十五丈旣下鬚鬚皓然還語子弟曰宜絕此法

### 乾德鑄字

趙太祖德四鑑背有乾德四年鑄字上大驚曰

安得已有四年所鑄乎宰相竇儀曰昔僞蜀  
有此年號上乃嘆曰宰相須用讀書人

宋長編

### 大書鷺字

嗟我久閣筆不書紙尾鷺蘇西新橋詩也王氏  
法帖最後大書一鷺此帖之珎酌至五十餘萬

### 虞永興字

有人收得虞永興與圓機書一紙剪開字字賣  
之礬鄉二字得麻一斗鶴口二字得銅硯一枚  
房村二字得芋千頭隨人好之淺深

字錦

### 鳳尾諾字

唐紀凡諸侯箋奏皆批曰諾而草書若鳳尾形  
齊江夏王鋒五歲高帝使學鳳尾諾卽工帝大  
悅以玉麒麟賜之

史

### 羶筆書字

李紆放舉人榜未及填禮部貢院字值令史醉  
以羶筆染不能加墨迨明方覺濃淡相間反致  
其妍遂爲故事

撫言

### 鬼畏草字

少保馬公亮少時夜閱書忽有大手如扇自窻  
入公以筆濡雄黃水書草字窻外大呼速爲我

滌去不然禍及汝公不聽而寢將曉哀鳴手不能縮且曰公將大貴我戲犯公何忍致我極地耶不見溫嶠燃犀事乎公悟以水滌去遜謝而退

### 犢脇生字

真元中海鹽縣戴文家富性貪刻剝文死隣家一牛生黑犢脇下白毛成字曰戴文文子恥之乃知其父妄取隣之錢也

### 書字殺鼠

晉淳于髡善厭勝劉柔夜鼠嚙其左手中指髡



爲朱書手作田字露手臥明旦鼠伏死

書符召鼠

許邁爲鼠嚙衣作符召鼠畢至中庭惟一鼠住  
伏不敢動

別傳

書名殺怪

范仲淹字希文嘗夜讀書窓外有巨面物戲之  
公泚筆書之曰爾面雖然大難欺范仲淹翌日  
廟鼓面有此字破之枯骨滿腔焚之怪絕

聞名愈瘡

晉桓石虔小子

勇猛冠時有患瘡者稱桓

石虔以佈之多愈

齊桓康江南人畏之以其名佈小兒病瘡者以其形帖牀壁立愈

史

誦詩愈瘡

有病瘡者夢子美云誦吾詩可治乃令誦手提髑髏血模糊之句病果愈

古今詩語

呼名止啼

石勒將麻秋胡人也性彪險有小兒啼其母輒呼麻名恐之曰麻胡來也兒啼卽止